

खबरां

- प्रधानमंत्री नरेंद्र मोदी होरें नमीं दिल्ली च 17में राश्ट्री रोजगार मेले च आखेआ जे रोजगार मेले नौजवानें दे सुखने गी पूरा करने दा जरिया ना।
- बिहार विधानसभा चुनां दे पैहले चरण आस्तै प्रचार तेज। बीजेपी दे सीनियर लीडर ते प्रधानमंत्री नरेंद्र मोदी होरें बिहार दे समस्तीपुर च जनसभा गी संबोधित कीता।
- आंध्र प्रदेश दे कुरनूल जिले च बस च अगग लगने करी 20 लोकें दी मौत होई गई ऐ।
- विदेश मंत्री डॉ. एस जयशंकर होरें आखेअ जे बहुपक्खवाद दे प्रति बचनबद्धता निगगर बनी रौहनी चाहिदी ते संयुक्त राश्ट्र दा समर्थन कीता जाना चाहिदा।
- भारत नै बहरीम च एशियाई युवा खेड्डें-2025 च कबड्डी च 2 सुन्ने दे तगमें जित्ते ना।

<><><><><><>

PM-Rozgar Mela

प्रधानमंत्री नरेन्द्र मोदी होरें अज्ज आखेआ ऐ जे रोजगार मेले, मुख्य दे नौजवानें दे सुखने पूरे करने दा इक जरिया बनी गेदे ना। प्रधानमंत्री होरें एहू गल्ल अज्ज नमीं दिल्ली च आयोजित 17में राश्ट्री रोजगार मेले च इक वीडियो संदेस दे राहें आखी। इस कार्यक्रम दे दरान बक्ख-बक्ख सरकारी मैहकमें ते संगठनें च नमें भर्थी नौजवानें गी 51 ज्हार शा मते नियुक्ति पत्र बंडु गे ना। श्री मोदी होरें आखेआ जे इनें रोजगार मेले दे राहें गै 11 लक्ख शा बी मते युवाएं गी नियुक्ति पत्र बंडु गए ना। प्रधानमंत्री होरें देसै च विकसित भारत योजना गी बी शुरु करोआया ऐ जेहदा मकसद साड्डे 3 करोड़ नौजवानें गी रोजगार उपलब्ध करोआना ऐ। श्री मोदी होरें आखेआ जे युवाएं गी सशक्त बनाना भाजपा-एनडीए सरकार दी प्राथमिकता ऐ। श्री मोदी होरें इस गल्ला पर जोर दिता जे स्किल इंडिया मिशन जनेहू अभियान नौजवानें गी कौशल सिखलाई प्रदान करदे ना।

<><><><><><>

Rijju-Rozgar Mela

तोआई पार्लिमानी मामलें ते अल्पसंख्यक मामलें दे केन्द्री मंत्री किरिण रिजिजू होरें अज्ज कटरा दी श्री माता वैष्णो देवी युनिवर्सिटी च आयोजित रोजगार मेले च हिस्सा लैता। इस मौके पर किट्टु अगो भाशण दिंदे होई मंत्री होरें आखेआ जे रोजगार मेले आहली पैहलकदमी, बक्ख-बक्ख खेत्तरें च रोजगार दे मौके कायम करदे होई नौजवानें गी सशक्त बनाने दी सरकार दी मजबूत वचनबद्धता गी दर्शादी ऐ। उनें आखेआ जे ज्हारां बद्धे नौजवानें गी बक्ख-बक्ख सरकारी मैहकमें च नियुक्त कीता जा'रदा ऐ ते इस गैहू दे कन्नै नां छड़ा कम्म-रोजगार दे मौके पैदा होआ करदे न सगुआं राश्ट्र दे युवाएं अंदर आत्मविश्वास बी बधा करदा ऐ।

<><><><><><>

## Bihar-Campaign

बिहार च पैहले चरण दे राज्य असेंबली चुनांस आस्तै एनडीए ते महागठबंधन दे स्टार प्रचारकें कई रैलियों गी संबोधित कीता। सीनियर बीजेपी लीडर ते प्रधानमंत्री नरेंद्र मोदी होरें अज्ज राष्ट्री जनतांत्रिक गठबंधन दे प्रचार गी शुरू करदे होई समस्तीपुर च इक रैली गी संबोधित करदे होई उनें समाजवादी नेता कर्पूरी ठाकुर हुंदी विरासत गी चेता करदे होई राज्य च विकास गी गति देने ते सामाजिक न्या सुनिश्चित करने दी जरूरता पर जोर दित्ता। दुधपुरा हैलीपैड ग्राउंड दे इक जलसे च उनें कर्पूरी ठाकुर होरें गी देश दा इक अनमुल्ला हीरा दस्सेआ जिन्नै अजाद भारत सामाजिक न्या आंदा ते गरीब ते पिछड़े गी नमें मौके कन्नै जोड़ेआ। इस थमां पैहले उनें कर्पूरी ग्राम च साबका मुख्मन्त्री होरें गी पुष्पांजलि भेंट कीती जिनें पिछड़े ते हाशिए पर जीने आहले समुदाएं आस्त मता किश कीता। तोआई, महागठबंधन दे मुख्मन्त्री मेदवार ते आर.जे.डी दे नेता तेजस्वी प्रसाद यादव होरें पटना च पत्रकारें गी संबोधित करदे होई आखेआ जे ठेके दे मलाजमें गी पक्का कीता जाग ते राज्य च बेरोजगारी दी समस्या गी हल कीता जाग।

<><><><><><>

## Andhra-Accident

आंध्र प्रदेश दे कुरनूल जिले च अज्ज बडुलै हैदराबाद थमां बेंगलुरु जारदी इक प्राइवेट स्लीपर बस दे मोटरसाइकिल कन्नै टकराने करी अगग लगगी गई। इस हादसे च 19 यात्री ते इक बाइक चालक मारेआ गेआ ते कई होर घायल होई गए। जिला कलैक्टर डॉ. ए. सिरी नै दस्सेआ जे बस च दो डरैवरें सने 41 लोक सवार हे। राष्ट्रपति द्रौपदी मुर्मू, उपराष्ट्रपति सी.पी राधाकृष्णन ते प्रधानमंत्री नरेंद्र मोदी होरें हादसे पर बसोस प्रगट कीता ऐ। प्रधानमंत्री होरें प्रधानमंत्री राहत कोष चा मरने आहलें दे परिवार आहलें गी दो-दो लक्ख ते घायलें गी 50-50 ज्हार रपे सींधी सहायता देने दी घोशणा कीती। आंध्र प्रदेश दे मुख्मन्त्री एम. चंद्रबाबू नायडू होरें त्रासदी पर दुख व्यक्त करदे होई घायलें गी हर लोडचदी मदाद देने दे निर्देश दित्ते।

<><><><><><>

## Prez. Kerla Visit

राष्ट्रपति द्रौपदी मुर्मू होरें अज्ज केरल दे एनकिलम च सेंट टेरेसा कालेज दे शताब्दी समारोह दा उद्घाटन कीता। किट्टु गी संबोधित करदे होई राष्ट्रपति होरें आखेआ जे विकसित भारत बनाने आस्तैम महिलाएं दी भागीदारी अत्त लाजमी ऐ। उनें आखेआ जे महिलाएं दी अगुवाई आहला समाज मता मनुक्खता भरोचा ते प्रभावी होगा।

<><><><><><>

## Rajnath Army Commander

रक्षा मंत्री राजनाथ सिंह होरें अज्ज राजस्थान दे जैसलमेर च सेना कमांडरें दे सम्मेलन दी अध्यक्षता कीती। सेना कमांडरें दा सम्मेलन सेना दे सीनियर नेतृत्व आस्तै सुरक्षा स्थिति दा आंकलन करने, परिचालन प्राथमिकताएं पर सोच-विचार करने ते महत्व आहले नीतिगत फैसले लैने आस्तै इक उच्ची सतह दा संस्थागत मंच ऐ। सी.डी.एस जनरल अनिल चौहान दे कन्नै श्री सिंह होरें मौजूदा सुरक्षा स्थिति दी समीक्षा कीती।

<><><><><><>

## PM MKB

प्रधानमंत्री नरेंद्र मोदी होर औंदी 26 अक्तूबर गी अपने माहवार रेडियो कार्यक्रम “मन की बात” दे राएं देश-बदेश च रौहने आहले श्रोताएं कन्नै अपने बचार सांझे करडन। हर म्हीने दे खीरले ऐतवारें दिनै 11 बजे प्रसारित होने आहले इस कार्यक्रम दी एह 127मीं किश्त होग। एह कार्यक्रम आकाशवाणी समाचार दी वैबसाईट newsonairmobile ऐप्प पर बी प्रसारित कीता जाग। इसदे कन्नो-कन्नो एह प्रोग्राम आकाशवाणी समाचार, DD News, प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी प्रसारित कीता जाग।

<><><><><><>

## GST

जी.एस.टी दिएं दरें च हाल च कीते गेदे सुधारें कन्नै मुल्ख भरै दे परोआरें गी सिद्दी राहत हासल होआ करदी ऐ। आम इस्तेमाल आहली चीजें जि’आं दुध, पनीर, बिस्कुट, मक्खन, घ्यो ते इलैक्ट्रानिक्स चीजें पर जी.एस.टी घटने कन्नै हुन परोआरें दे बजट उप्पर घट्ट बोझ पवा’रदा ऐ ते लोकें दी खर्च करने दी ताकत बधा करदी ऐ। उधमपुर जिले दे बसनीकें इलैक्ट्रानिक्स ते होरनें जरूरी चीजें उप्पर जीएसटी दिएं दरें च कटौती लेई केन्द्र सरकार दा धन्नवाद करदे होई आखेआ ऐ जे ऐसी पैहलकदमियां मझाटले तबके दे परोआरें लेई बड़ी फायदेमंद ना।

<><><><><><>

## Sabki Yojana-Sabka Vikas

जन योजना अभियान सबकी योजना सबका विकास पर आधारित दो मिनट दी जनसेवा जागरूकता फिल्ल अज्ज थमां 6 नवंबर तगर पूरे देश दे सिनेमाघरें च दस्सी जाह्ग। पंचायती राज मंत्रालय नै इक बयान च आखेआ जे एह नरेंद्र मोदी हुंदे लोकभागीदारी ते सरकारी योजनाएं दी व्यापकता दे दृष्टिकोण दे मताबक ऐ। इस अभियान दा मकसद 2026-27 आस्तै पंचायत विकास योजना दी तैयारी च जन जागरूकता ते जनभागीदारी गी बढ़ावा देना ऐ।

<><><><><><>

## EAM-Multilateralism

विदेश मंत्री डॉ. एस जयशंकर होरें अज्ज आखेआ जे बहुपक्खवाद आस्तै बचनबद्धता मजबूत बनी रौहनी चाहिदी ते संयुक्त राश्ट्र दा समर्थन कीता जाना चाहिदा। संयुक्त राश्ट्र दे 80 बरे होने पर नमीं दिल्ली च स्मारक डाक टिकट जारी करदे होई डॉ. जयशंकर होरें शांति ते सुरक्षा दे कन्नै-कन्नै विकास ते तरक्की दे आदर्श दे प्रति भारत दी प्रतिबद्धता गी चेता कीता। उनें जोर दिता जे भारत म्हेशां संयुक्त राश्ट्र ते बहुपक्खवाद दा चेचा समर्थक रेआ ऐ ते अग्गे बी रौह्ग।

<><><><><><>

## ISIS-Terror Module

दिल्ली पुलस दे स्पेशल सेल नै आई.एस.आई.एस दे इक आतंकी गिरोह दा पता लाई 2 संदिग्ध आतंकवादिएं गी गिरफ्तार कीता ऐ। नमीं दिल्ली च इक प्रेस कांफ्रेंस गी संबोधित करदे होई स्पेशल

सेलदे अडिशनल सी.पी प्रमोद सिंह कुशवाहा होरें दस्सेआ जे आरोपियें गी 16 ते 18 अक्तूबर गी दिल्ली ते भोपाल थमां गिरफ्तार कीता गेआ। श्री कुशवाहा होरें दस्सेआ जे दवें संदिग्ध इक आई.ई.डी धमाके दी योजना बना रदे हे ते कथित तौर पर तुर्की-सीरियरा सीमा दे नेडे इक आई.एस.आई.एस दे हैंडलर दे संपर्क च हे।

<><><><><><>

### World-Polio Day

अज्ज विश्व पोलियो दिवस ऐ। इस मौके पर स्वास्थ्य ते परिवार कल्याण मंत्री जगत प्रकाश नड्डा होरें सशक्त जनभागीदारी दे राहें पोलियो दे खात्मे च भारत दी शानदार यात्रा पर लो पाई। इक सोशल मीडिया पोस्ट च श्री नड्डा होरें आखेआ जे पोलियो अनमूलन च सफलता स्वास्थ्य कर्मियें दी कोशिश कन्नै मुमकन होई ऐ। उनें हर घरै च पुज्जियै एहू पक्का कीता जे बमारी दे खलाफ लड़ाई च कोई न्याणा छुड़की नेई जा।

<><><><><><>

### LG-NEP Conclave

उपराज्यपाल मनोज सिन्हा होरें उच्च शिक्षा विभाग आसेआ श्रीनगर दे अमर सिंह कालेज च आयोजित राष्ट्री शिक्षा नीति NEP सम्मेलन-2025 दे उद्घाटनी सत्र गी संबोधित कीता। उनें इस गल्लै पर गौह मसूस करदे होई जे जम्मू-कश्मीर मुल्लख भरै च पैहला ऐसा प्रदेश च, जिन्नै खित्ते दे सभनें उच्च शिक्षा इदारे च राष्ट्री शिक्षा नीति लागू कीती दी ऐ। उनें आखेआ जे प्रशासन भविक्ख आस्तै ऐसा शैक्षणिक पारिस्थितिकी तंत्र बनाने पर ध्यान केंद्रित करा'रदा ऐ जेहड़ा समावेशी होने दे कन्नोकन्नी नमियें काहडें आहला ते असरदार होऐ। उनें अगगे आखेआ जे उंदा मकसद ऐ जे जम्मू-कश्मीर दा हर इक विद्यार्थी अपने समर्थ गी पंछानने ते सशक्त बने तां जे भारत गी 2047 तगर विकसित मुल्लख बाने आहले सुखने गी साकार कीता जाई सकै। एहदे लेई जम्मू-कश्मीर दे हर इक विद्यार्थी गी इस विकास जात्तरा च अपना योगदान देना लोड़चदा।

<><><><><><>

### Kabaddi

बहरीम च एशियाई युवा खेडू खेल-2025 प्रतियोगिता च भारत नै अंडर-18 जागते ते कुडियें दी टीमें स्वर्ण पदक जित्ते ना। कडियें दी टीम नै फाइनल च इरान गी 75-21 कन्नै हराया। जागते दी टीम नै बी फाइनल च इरान गी 35-32 कन्नै हराया।

<><><><><><>

### IHPL-Cricket

टी-20 इंडिया हैवन प्रीमियरल लीग दा उद्घाटन सत्र च कल श्रीनगर दे बक्खी स्टेडियम थमां शुरू होआ'रदा ऐ जेदे च राष्ट्री ते अंतरराष्ट्री क्रिकेटर जि'यां क्रिस गेल समेत होर दुए खडारी बी शामिल होडन। इस उच्च स्तर दी टूर्नामेंट च 8 टीमां शामिल होडन जेडी 15एं दिनें च इक-दुए कन्नै मुकाबला करडन। आयोजके दा आखना ऐ जे इस टूर्नामेंट गी करोआने दा मकसद क्षेत्रे च खेडू ते सैलसफा गी बढ़ावा देना ऐ। अधिकारियें इस समारोह आस्तै कडे इंतजाम कीते दे न तां जे खडारियें ते मैच दिक्खने आहलें गी कोई परेशानी नेई होऐ।

<><><><><><>